



Peluasan program Baitul Mahabbah Imigresen tingkatkan imej negara

Oktober 17, 2023 @ 8:48am

KUALA LUMPUR: Peluasan program Baitul Mahabbah Jabatan Imigresen dapat meningkatkan imej negara di persada antarabangsa dalam usaha menjaga hak asasi kanak-kanak warga asing.

Ketua Pengarahnya, Datuk Ruslin Jusoh berkata penyediaan tiga lagi pusat Baitul Mahabbah itu menunjukkan keprihatinan kerajaan terhadap komitmen Kementerian Dalam Negeri (KDN) dan jabatan itu dalam memastikan kebajikan kanak-kanak yang berada di depot Imigresen terus terpelihara dan selamat.

"Inisiatif ini adalah komitmen KDN dan Jabatan Imigresen selaras dengan konsep Malaysia MADANI yang menerapkan teras ihsan terhadap semua golongan," katanya.

Perdana Menteri, Datuk Seri Anwar Ibrahim ketika membentangkan Belanjawan 2024 Malaysia MADANI, di Dewan Rakyat, Jumaat lalu, berkata kerajaan akan memperluas program itu di tiga lagi pusat penempatan sementara masing-masing satu di Sabah, Sarawak dan Semenanjung dengan peruntukan RM10 juta.

Baitul Mahabbah adalah inisiatif KDN bagi memastikan kanak-kanak berada di depot Imigresen selamat dan terpelihara dan bersifat sementara sehingga proses dokumentasi oleh kedutaan negara masing-masing selesai.

Baitul Mahabbah Jabatan Imigresen yang pertama bagi menempatkan kanak-kanak berusia 10 tahun ke bawah sudah diwujudkan di Kompleks Kediaman Awam Lapangan Terbang Antarabangsa Kuala Lumpur (KLIA).

Dalam pada itu, Felo Kanan Akademi Penyelidikan Strategik Nusantara (NASR), Prof Madya Azmi Hassan, berkata langkah itu dilihat mampu membaiki kedudukan negara dalam Laporan Tahunan Jabatan Negara Amerika Syarikat Mengenai Pemerdagangan Orang ('US Tip Report').

"Ia sebagai transit (penempatan sementara) supaya kanak-kanak ini diberi perlindungan sepenuhnya.

"Jadi, ini menunjukkan keprihatinan kerajaan terhadap isu imigran terutama sekali mengurangkan isu pemerdagangan manusia," katanya.

Malaysia kekal berada pada peringkat tiga (Tier 3) dalam 'US Tip Report' pada 2021 dan 2022.

Malaysia berada pada peringkat dua dalam laporan tahunan itu, pada 2017 dan berada di senarai pemantauan peringkat dua dari 2018 hingga 2020.- BERNAMA